

Purschida rumantscha a las universitads

■ (anr/vi) **La confederaziun duai coordinar tranter il Grischun e las universitads per ch'ins possia era en l'avegnir studegiar rumantsch. La chombra pitschna ha acceptà il glindesdi saira ina moziun da cumissiun.** «Jau hai gè plachair ch'i n'ha dà gnanca ina solia reacziun negativa», di *Ivo Bischofberger* (pcd/AI). Sco pledader da cumissiun ha el ha el fatg attent il cussegl dals chantuns a la situaziun «propi seriusa» pertutgant las purschidas da studegiar rumantsch. I saja dispit necessari da signalisar sustegn als students che stoppian planisar il studi.

Il cussegl naziunal sto anc tractar la moziun. Bischofberger è optimistic e manegia ch'era la chombra gronda vegnia ad esser pertscharta da la muntada da l'intervenziun.

I va per la furmaziun dals magisters

Da muntada centrala per mantegnair ina lingua saja la scola, ha argumentà il pledader en la chombra pitschna. En quels lieus, nua ch'ins stritgia il rumantsch ord il plan d'instrucziun, sco per exempel pli baud en Tumleasta, giaja la cumpetenza da discurre a perder. Per las scolas sajan ils chantuns responsabels. Il Grischun prestia bler sin stgalim primar e secundar.

Ma il Grischun na saja nagin chantun cun universitad. Ils students sajan avisads che auters chantuns porschian in studi rumantscha. Quai valia cunzunt per la furmaziun per scolasts secundars e gimnasials, ha ditg Bischofberger. La scol'auta pedagogica dal Grischun porschia sulet ina furmaziun per scolasts primars. I dovria era docents ed academichers per ils instituts da cultura ed organisaziuns rumantschas.

Contribuziuns liadas a projects

«La purschida actuala da furmaziun universitara da rumantsch è sufficienta», ha ditg cusseglier federal *Didier Burkhalter*. La dumonda saja dentant, quant ditg che questa purschida vegnia mantegnida. Dad ina vart stettia avant porta ina pen-



Didier Burkhalter: «Nus essan pronts da coordinar.»

KEYSTONE

siun d'in professur ed i possia era dar auters problems. Perquai saja il cussegl federal da l'avis ch'i saja d'acceptar la moziun. Il mantegniment d'ina purschida da rumantsch sin stgalim universitar duess vegnir considerà sco in'incumbensa communabla da la confederaziun e dals chantuns. «Nus essan pronts da giugar ina rolla da coordinaziun en questa chausa», ha ditg il cusseglier federal avant la chombra pitschna.

El ha era fatg attent che la lescha da scolas autas ch'è dacurt vegnida delibera da las chombras federalas, prevedia la pussaivladad da promover la plurilinguitad entras contribuziuns liadas a projects. La decisiun davart talas contribuziuns stettia sura a la nova organisaziun, che na saja anc betg installada, ma che vegnia ad esser in organ da la conferenza svizra da las scolas autas.

La formulaziun da la moziun

Il text da la moziun da cumissiun tuna sco suonda: «Il cussegl federal vegn incumbensà – en collavuraziun e coordinaziun cun ils chantuns e per il mantegniment e la promoziun da la lingua e cultura rumantscha – da s'engaschar resp. da procurar ch'i vegn purschì a las universitads ina furmaziun da scol'auta en lingua e litteratura rumantscha.»